

حالات

شعر

على عبد الرحمن أبو سراج

تقديم

الأستاذ • الدكتور

مصطفى رجب

العلم والإيمان للنشر والتوزيع

البيانات			
عنوان الكتاب - Title		شعر حالات	
المؤلف - Author		علي عبد الرحمن أبو سراج	
الطبعة - Edition		الأولى .	
الناشر - Publisher		العلم والإيمان للنشر والتوزيع .	
عنوان الناشر Address		كفر الشيخ - دسوق - شارع الشركات ميدان المحطة. تليفون : ٠٠٢٠٤٧٢٥٥٠٣٤١ فاكس : ٠٠٢٠٤٧٢٥٦٠٢٨١	
بيانات الوصف المادي		عدد الصفحات Pag.	مقياس النسخة Size
		٦٨	٢٤,٥ x ١٧,٥
المطبعة - Printer		الجلال .	
عنوان المطبعة Address-		العامرية إسكندرية.	
اللغة الأصل		اللغة العربية .	
رقم الإيداع		٢٠٠٨ / ٢١٠٠ م	
التوزيع الدولي I.S.B.N.		977- 308 -175 - 3	
تاريخ النشر - Date		2008	

حقوق الطبع والتوزيع محفوظة

تحذير:

يحذر النشر أو النسخ أو التصوير أو الاقتباس بأي شكل

من الأشكال إلا بإذن وموافقة خطية من الناشر

إهداء

إليه أولا .. وإليه آخرا

وإليه دائما .. أبى .. معلمى

وإلى أمى وأهلى وأسرتى

وأصدقائى

واليكم ما استطعت

على

الفهرس

م	الموضوع	الصفحة
١.	تقديم الأستاذ الدكتور مصطفى رجب	٥
٢.	مانحبكهاش	٧
٣.	مذنب.....	١٣
٤.	القطه السوداء	٢٠
٥.	خطى يا موت على كل الفقرا.....	٢٦
٦.	متهوم بالعشق.....	٢٩
٧.	إصحى من النوم.....	٣٢
٨.	واخذ على خاطرى منك !!	٣٩
٩.	مسألة	٤٦
١٠.	أفكار واحده.....	٥٠
١١.	خير..!!	٥٣
١٢.	مستنى اموت !!.....	٥٦
١٣.	إنتبأاه.....	٦٢

تقديم

الشاعر علي أبو سراج عضو نادي الأدب بمركز طما - سوهاج واحد من أكثر مبدعي القصيدة العامية تميزا في صعيد مصر، من جيل الشباب، وقد مثل ناديه في عدد من المؤتمرات والمهرجانات الشعرية المحلية والقومية، وفاز في عدة مسابقات كبرى بمراكز متقدمة، وقد استصفته - مع غيره - في أمسيات شعرية بجامعة سوهاج وقي جمعية الثقافة من أجل التنمية بسوهاج فحاز قصب السبق بين نظرائه، ونال استحسانا وإعجابا كبيرين من الجمهور لما تتميز به طريقة إلقاءه من تمكن وتفنن،

وقصائد علي أبو سراج - وإن كانت من القصائد قصيرة النفس مشحونة بإحساس عميق، وصدق فني عال، تمكن به شاعرنا من أن يحقق لنفسه هذه القدرة التي تفرد بها بين أقرانه على التصوير، والتقاط المفارقات، وتكثيف التعبير / وبساطة اللغة مع سلامتها، وهذا هو سر نجاحه وتألقه.

تحية لعللي أبوسراج ولديوانه الجديد (حالات)

وأتمنى له التوفيق الدائم ومزيدا من الإبداع

أ.و. مصطفى رجب

رئيس ناوي اللوب (المركزي) بمحافظة سوهاج

ما تحبّكهاش

مش طايق نفسي ...

ونفسي اتحرر منها

واعيش درويش ... !!

أواروح

وما اجيش

لا يحوشني طريق

ولا باب ولا شيش !!

يووووه

أما انا ملعون !!

دا انا زي ما اكون

مسئول عن حال الناس

والكون

وباحاسب روى
وباقسى عليها
وتاهم نفسى بصدق ..
بزور ..
إنى انا غلباوى ..
وسلبى دون !!
وساعات مجنون
والعجز مخلصى ضميرى يثور
يصرخ ويقول .. ما تحبكهاش ..
ما تخايلنىش !!
وانا برضه معاه !!
ماهى أوحش حاجه ..
إنك تهري دماغك فكر !!
خش الذكر ..

دندن وامشى مع الدراويش
كل ما تشغل فكرك أكثر
كل ما قلبك يحزن أكثر
كل ما يومك يوحش أكثر
كل ما تكره عيشتك أكثر!!
من يومية وتاعباني دماغى ..
وانألم .. آخذ فى صداغى
أتكلم ..
يتقال عدوانى !!
والاقيهم ..
قطعوا لى لسانى
دلوقت خلاص ..
تتهدى يا دنيا
ما تتهديش ..

مش ح اشغل بالي
ما تلزمينيش !!
غاية ما هناك ..
نفسى الأحزان ما تحاصرنيش
ومعاى .. معايش
أنا اقرقش عيش
أو حنة ملح وجبنه قريش
أسرح عريان ..
أتغطى بخيش
مش مشكل ..
طول ما اسيادي تعيش
ما انا باصحى وابات
شبعان إهانات
وبكا وتلطيش

مش عايزم الدنيا دهيه

لا ونيس ..

ولا لقمة ..

ولا ميه

ولا حتى الهدمه اللى عليه

وايام وتفوت !!

يا ضمير بيموت

ما تأخذنيش ..

أنا ميت قبلك ..

ما بيديش ..

وسامحنى ..

آدى حال الدنيا

معووجه

معووجه وماشيه ..

حالات

بعواجه ..

تعملش حساب

غيرلخواجه !!

أنا كارهك

وابصم بالعشره

مش عايز من وشك

حاجه !!

مذنب (ممداه إلى ولدى إسلام)

أنا شفت فى عينيك اتهام !!

ودبحنى صوتك فى البكا

هدد كيان الروح

وزلزل مهجتى

صبحت

حطام

والحق معاك ..

انما قلبى

مليان بكلام ..

ممكّن تسمع ؟!

أنا عارفك

مش ح ترد عليه

ولا حتى ح تفهم منى كلام

انما

محتاج ارتاح

من إحساس بالذنب

محاصر كل ساعاتى

ومنغص عيشتى ..

وقالقنى ..

ومقلقل راحتى ..

وجنابى طول الليل تتململ ..

ماعرفتش انام

وانت يا ضحكة عمرى

بكل براءة عمرك ..

نايم !!

والفرشه بتاعتك

بتطبطب على بدنك ..

تضحك ..

ف تخليني ابتسم

وابكى !!

أبكي من خوفى عليك ..

ح تقابل بكرة ازاي ؟!

إسلام ..

مش قادر ابص ف وشك ..

التهمة اللى شايفها ف عينك ..

خلتني اشهد لك ..

غلطان ..!!

وعرفت بغلطى وندمان

أنا كنت أنانى وعميان

وجريت ورا نفسى الأماره ..

ف ظلمتك ..
جبتك بالغصب
للدنيا القاسيه الجباره !!
الدنيا اللي بتقفل بابها
ف وش الغلبان
وتسيبه يفرط براها ..
بين حيره ويأس وحرمان ..
أنا آسف ..
وف قلبي مراره
وايامى بطعم الصبار
أنا مجرم ..
إكتب .. واتملى :
(الدنيا رحايه بتتسلى
ع الفقرا وطاحناهم .. غله

كان غرضي ف عيله وضليله

نتشاقى ونلعب يا حليله

ويا دويك ..

ح نقول (بسم الله) ..

الدنيا خدتنا من الضله ..

ورمتنا ف نار)

إسلام ..

لو عايز تنفذ بحياتك ..

وتقضى يومينك بسلام ..

إتعلق باللى يحبوك ..

واستغنى ..

يمكن تدليك

إتعفف ..

واقبض على دينك

وف حلمك ..

خليك معقول !!

إسلام ..

أنا مذنب ..

لكن .. أرجوك ..

إوعاك تلعن فى اللى جابوك

وان مت ابقى اقرا لى الفاتحه

واوعدننى ما تقساش على ابوك

يابنى الله لا يسيئك ..

سامح ..

أنا أذنبت ورايح .. رايح

وح اسيبك ..

مرفوع الراس ..

إتباهى بابوك قدام الناس ..

مذنب ..

بس ان جيت للجد

عشت ايام الدفا والبرد

عمرى ما مديت إيدى لحد

ولا بصيتش فى حاجة حد ..

عشت فقير ..

وما سيبتش عار ..

عم اسلام ..

أنا خلصت كلامى معاك ..

وانت وقلبك !!

الفقر بيقطعم ضهر الحلم ..

وانا مهزوم .. مكسور .. منهار ..

لكن ..

خايف اخش النار !!

القطه السوداء

القطه السوداء طالعہ ..

بتمزمز فی الفیران

والحیہ .. لسه حیہ

بتولع الغیطان

وتسمم البہایم ..

وتبهدل النسوان

یا عالم ..

إنتبأاااااااااا ..

الموت عشش علینا ..

والظلم ف منتهاه

سعروا ولاد الذین

طاحوا فی بلادنا ..

بيننا ..

ولا حوق فى اللى جايهم ..

لا صوم

ولا .. صلاه !!

دعوه يا أهل الله

يارب .. صحينا

يارب .. نجينا

قلقان وسنين باهاتى

والنار بتزيد يوماتى

يا سيادى ..

يا ساداتى ..

ضاققت بينا البيوت

ضاققت بينا السكك

والقطة السودا ناويه ..

تدخل كل الديار
وتزيد النار.. بنار
وتاكل اللحامى ..
وتمصص العضامى
فيناك ..
يا ابو قلب حامى
تعيد لى غنواياتى
وتخلى النور يواتى ..
ع النيل ..
والأهرامات ..
دا القطه السودا جايه
بتعدل الخرايط
وتغير المسار
وتخدر العبايط

وتحكم الحصار
وانت .يا ابو قلب بارد !!
يا عرة الفرسان ..
الديا بتستحثك ..
أنطق ..
سمعها حسك ..
عيشه وأخرتها موت
قاوح ..
واصمد ..
وعارض ..
الحزن .. ظرف عارض
والفرح أولى بيينا
إنوى وريك معانا
قوم .. كسر القضبان

وفتح البيبان
سيفك .. لو كان رهينه
أيادينا سيوف فى إيدك
وأيدينا ..
مش جبانه
بكفايه عليك إهانه
أرجوك .. عشان خاطرها ..
ما تفرش م الميدان
القطه السودا .. بانتي ..
ف اعمل حساب م الآن
عيشه والموت آخرها ..
ما تموتش بهلوان !!
وانتي يا هاديه ورزينه
يا مبليه وحزينه

مش عايزك تمشى ليله

فى سكة الجديان

القطه بترازينا ..

واحنا فى الوحل ادينا ..

متنيلين بنيله .. !!

مين قال العقل زينه ؟!

فيه أحسن م الجنان ؟!

خطى يا موت على كل الفقرا

بنعيب فى الأسياد ..

ونهاتى ..

ما احنا لساننا طويل ..

وفلاتى .. !!

والأسياد مش ممكن تقبل ..

إن عبيدهم تكمش .. تدبل !!

قولوا ورايا ياليلى يا عين

إحنا شوية ناس .. ملاعين

دى الأسياد .. يا عباد .. مساكين

حطوا الخطه وراها الخطه ..

واتبلوا بينا ليوم الدين !!

والأسياد .. مش عارفه تعيش

لاجل دوانا ..
ولاجل العيش !!
دول نايمين ..
قايمين ..
قاعدين ..
على بلاوينا ..
ونطفح ايه !!
واحد (بيه) ع الشاشه امبارح ..
قال (والله كرهت حياتى) !!..
لوع الحق ..
الحق معاه !!..
دا احنا يوماتى ..
ما يكفيننا .. طن (حراتى) !!
إحنا نفوت احسن لاسيادنا

إحنا يارب ارزقنا بجلطه

خلى اسبادنا يارب تعيش

من غير غم .. ومن غير هم ..

هما أحق !!

طبعا احق !!

واحنا نغورم العيشه الزق !!

خطى يا موت على كل الفقرا ..

ما تخليش ع الكوكب .. أجرا ..

إحنا ان متنا تزول الورطه ..

إحنا عيشتنا أساسا .. غلطه !!

متهوم بالعشق

أنا صوتى اتحش ..

وعضى اتدش

وكل يومين ..

اتخبى ف جلدى ..

واكش .. اكش !!

مش عارف ..

مين قص لى الريش ؟!

ولا فين .. ؟!

ولا شايف ..

غير تناتيش ..

على (بين) ..

وبقيت بالوقت ..

مهاود ..

هش ..

متهموم بالعشق ..

وقول الزور

وقالوا لى :

كسرت (كبابى) النور

أقولك إيه ؟! ..

إخرس ..

ما تقولش ..!!

(أصوات فى العتمه ..

حمول ع القفا

رسومات ع الوش !!

حلفان للبيه ..

يا سعادة البيه ..

التهمة صحيحة وثابته عليه !!)

وبلعت محيط إهانات ..

وخرست

ولعنت أبوكى ف سرى ..

وقعت !!

واريولى الباب

ف حبيت من جنب الحيط

وكفيت ع الحزن !!

(ماجور) !!

إصحى من النوم

صلى على اللى ح يشفع فيك

عارفك .. فيك اللى مكفيك

بس اسمعنى الله يعافيك

مصرك.. يا صديق

بتمر بضيق

والوضع مخيف

الوضع فظيع

خد بايدها وقوم ..

إصحى من النوم

وان قدت بنار..

هيه تطفيك

كل بلاد الدنيا بتعلى
وتسلم لولادها الشعلة
إلا بلادنا ..
إلا ف مصر !!
الملاعين ..
بالعين ميت قصر
والفقرا ..
عصروهم .. عصر
مين فى العالم زى حالاتها
رخصت واتداسست ورداتها
واتطفى قمرها ونجماتها
وفلوسها ف كرش المفاجيع
كدبوا علينا وعلى أهالينا
لما قالوا لنا الدنيا ربيع

واتفرغوا لليل والبيع
وانت يعزك ..
راح فين عزك ؟
لسه مقفل ع المواضيع ؟!
ريح قلبي ورد عليه
انت يا اخينا
وحد .. صلى الوضع شنيع
طرطق ودنك للمواضيع
لا ح انظر..
ولا اقول كلاكيع
الله يعينك
فتح عينك
واوعى لنفسك ..
إوعى تبيع

ست البلاد (العربيه)

وقعت فى إيد الحراميه

وبإيد عيالها الأعبيه

بقيت خلاص ..

لقمه طريه

والشله وقعت فى ال (خيه)

ما بقيش فى خاطر نخلاتها

ولا حد بيحلف بحياتها ..

وأفاعى الدنيا الملعونه ..

بلعوها ..

وحلوا ..

وبلعونا ..

هم يا قاعد على كرسيك

ياللى الهم هاريك وكاويك
إدى الغاليه حبابى عينيك
أنا قلت لك .. ومرسيك
إوعى الأيام لا تقسيك
فقرك حجه عليك ..
مش ليك
عاجبك دا اللى بيحصل فيك ؟!
فر .. وسيبك .. م التلاكيك
قول مش بايع ..
واصرخ بيها
قولها .. دى كلمه ..
حياتك فيها ..
ما تفرطش ف حقك ..
عادى ..

واوعى ان رحمت
تروح ع الفاضى
حق ولادك ويا ولادى
يلحقوا شبر ف ديل الوادى
صحصح لاحسن بكره تضيع
قول الكلمه ف وش الغول
قولها معايا ..
وافضل قول ..
قول مش بايع ..
قول ..
عليها ..
واعدل بيها ال ..
مش معدول
قولها رصاصه

حالات

ف و ش الساسه
سمع أسوان ..
واسطنبول

واخذ على خاطري منك !!

قلبك .. دهب صافى

شواف ..

عفيف ..

دافى ..

مخلوق رائع ..

خرافى ..

ما يوفيكش الكلام ..

واخذ على خاطري منك ..

وانا عارفك ..

غصب عنك

لكن ..

زعلان لإنك

ح تسيبنا للآلام ..

معقول .. خلاص مشيت

طب ذمه ودين ..

رضيت

دا انا لما عرفت ..

جيت ..

أقول .. خليك .. حرام

يا فرح ماشى .. وسايبنا

للحزن .. يستفرد بينا

عارفينه قدرك ..

ونصيبنا

الدمع يفضل ..

يرازينا ..

بتحبنا ..
واحنا نحبك ..
وتحس بينا ..
وينحسك ..
ومن الطيابه اللي ف قلبك
بنغنى دايمًا ..
على حسك
ياما وقفت معانا بجد ..
بالجدعنه ..
وبحكمه تهد ..
مهما يجيلك من أقاويل ..
بتشوفها بحنیه وود ..
دايمًا ..
واقف جنب الحق

صامد ..

جامد ..

واعر ..

صلد ..

قلبك واضح ..

زى الضهر

ما يهمكش لا بير ..

ولا بحر ..

وامتحانات الدنيا الدايمة

بتخوضها ..

وبتقوى عليها ..

تهزمها ..

وتعلم فيها ..

تطلع ناجح ..

وتعديها ..

ما بتمشيش ويا التيار

ممکن ..

تتحرش بالنار .. !!

لاجل العدل

ولاجل الخير

وادی شهايدك ..

حلوه وبیضا ..

إنت ما جیبتش فیها اصفار

والناس أهه ..

جایه تبارك

ویحضن قلبك

تتبارك ..

یارب یا حنین .. بارك

للى يخلى العتمه نهار

وانا جالى اقول ..

ألفين مبروك !!

وادوس على قلبى

عشانك ..

مبروك ..

لكن من ورا قلبى

قلبنى اللى موصل

فى حبالك ..

يا والدنا ..

يا أغلى مربى ..

يارب يصلح احوالك

لكن السؤال اللى تاغبى ..

وأكيد بيخطر على بالك ..

حالات

إِزَاى ح تَقْدَر تَفَارِقْنَا ..

وَتَفَرَّ ..

مِنْ حُضْنِ عِيَالِكَ ؟

مسألة

0V

۲۳ x

۲۲۸

113

۱۳۶۸

يااااااه.. أَلْف..

تلتميه تمانيه وستين ساعه !!

وما اشوفكيش ؟!

معقول ؟

وبقیٰنا ۶/۱۸ .. معقول ؟

مش قايله لى ..

غير الموت ما يحوشنيش عنك ؟

طب إيه ؟

نتيجة الحيط كدابه ؟

ولا انت اللى تعلمت الكذب ؟

أبدا ..

عمرك ما كدبت عليه !!

طب فلبى اللى بيحسب غيبتك ..

غلطان ؟

أبدا ..

واحسبها لك ..

أنا آخر مره قابلتك فيها ..

٢٢ أبريل

من يومها ..

وانا حالتى تصعب ع الكافر

فينك ؟

دا انا كنت ح اعادى الدنيا

عشانك ..

وآخذك غصب عن عين الكون

فينك ؟

دا انا دوخت عليكى

وحياة غيبتك عنى ..

لفيت وحفيت

وسألت عليكى ما خليت

حتى اسألى طوب الأرض

محتار وخلاص

قربت اتجن

الى تغيب المده دهيه ..

ما تسألش ..

٥٧ يوم .. ما تبانش

تبقى إيه ؟!

أنا عايزك تشهدي على روحك !

المسألة حلها واضح

وانا قلت لنفسى ..

لازم ماتت

ونويت اقرا الفاتحه عليكى

الفاتحه

.. ..

أفكار واحدة

راجع من شغلك مهدود

بتخائق دبان وشك

+ إنك ..

ما نمتش كويس

ليلة امبارح ..

ومعشم نفسك ..

ترتاح فى سريرك للصبح !!

ولقيتها

- بكامل هيئتها -

مستنياك

- واقع م الجوع

صورى الزفت

عربيات شرطه ودم وإسعاف
وعيال مفزوعه ونسوان
وبيوت ع الارض
إستأت ..
- الأكل ح يبرد
واقفه لك - بكامل هيئتها -
بتبيع أخبار!!
مش بيت صابر
إتخانقوا مع بيت فرحات
موضوع ..
ما يعديش بالساهل ..
والبت الغلبانه ام مطاوع ..
طلقها الندل
الراجل جاب لك وصل النور

- نفسى تسدت

شيلى الأكل ..

- مش ح تريح ؟

حاجه غريبه !!

هيه معاك

بتفكر برضه

ف نفس اللحظة

ترتاح فى سريرك ..

للصبح !!

خير..!!

السنة دى بتمشى .. فعلا ..

وديسمير ..

بيلم هدومه ..

- كالعادة -

ح اقولك غورى ..

- إلهى ما ترجعى -

ويناير ..

جايب سنته الجايه

وجاى يتنطط

كاوى البفته ما حدش

مالى عينيه

إيه اللى معاه ..

ما اعرفش ..

إنما - كالعاده -

ح اعشم نفسى ..

واقولها .. خير!!

ولوانى ..

- فى قرارة نفسى -

خايف منه بجد

لا مجايه تكون زى قريبه

أو ..

ما يجيبش مجايب .. أصلا

وينزلنى ..

لعاشر أرض !!

والاقى روحى ..

لما ييجى ديسمبر

أقولك غورى ..

- إلهى ما ترجعى -

ويجبنى يناير

تانى أعشم نفسى ..

واقولها .. خير .. !! !!

مستنى اموت !!

من غير ما حد يموت

ويحكى اللى شافه

مستنى اموت

الدنيا ..

زى اللى تكون

مخلوقه – لناس .. ناس –

إنت – مثلاً –

(بلاش)

أنا – مثلاً – مش قادر اعيشها

ولا عارف استمتع بحياتى !!

مع إنى باحب الناس والمغنى

ولعب الكوره

وصوت (عباسط) ..

وباحب خضار قلب الاطفال

بس الظاهر

- والله أعلم -

كل الحاجات دى

اتغيرت دلوقت !!

إتطفئ اللون

والنور

والشمس

وبقيت خل !!

حتى العيد اللي بييجى

م السنه للسنه ..

ما استنيت هوش ..

غير بس عشان ..

حتة لحمه بتيجى ف صبحيته ثواب

دا انا شكل سنانى نسيته

وطعم الشاى المغلى

وحلقى مرار

ولقيت نفسى

- من غير ما اقصد خالص -

باتسحب بهدووو

وف أبعد ركن ف حيطه الدنيا ..

باتفرج !!

ما عرفتتش اعلم فيها

- الموت أهون -

يووووه ..

يلعن ابوه الشعر

ان كان شوفنى اكترم اللازم

وان كان ح يجيب لى الضغط
من يوم ما بلانى الله بقوالته
ونازل هتش !!
إتسرق العمر وأخرتها ..
صلحت الكون ؟
طب إيه اللى انا خدته
من (قلع صحابه)
غير حرق الدم ؟!
وحلفت عليه - الله يقيده -
ولا حوقش معاه حلفان
ولازق لى
- زى العمل الردى -
ما عرفتتش افر بجلدى
مستننى اموت

واتفرج على حال الناس ..
من فوق
يمكن ابطال
أقصى على نفسى
يمكن بعد العمر دا كله ارتاح
واقدر اكون اللى ما كنتوش
واتخلص ..
من هم الهدمه
وهم اللقمه
وان شفت الفقر بعينى
ارميه بالطوب !!
واكشف كل مقالب الدنيا البايله
ما الوضع ساعتها ح يتغير
وح اقول كل اللى ف نفسى

وازعق ..

وارفض ..

واتفلسف ..!!

ما انا إيدى فى الميه البارده

وح اتحجج

بالموت !!

إنتباه

إصحى ..

ما تهبلش ..

فكر ..

إنتباه !!

إنت بتلاعب كبير

محترف فى مستواه

إوعى تغلط

إوعى .. حاسب

دورنا ماشى لمنتهاه

نقلتين والدورح يخلص

كش ملك .. تعمل إيه ؟

أنا رأيى انك تسلم !

يا ابنى أصلام البدايه
إنت ليه بتلعب معايا
وانت مش من مستوايا
يا ابنى خلص .. يا للا سلم !!
فين جيوشك .. ؟
فين دفاعك .. ؟
لسه فاكرا الدور بتاعك ؟
بص .. هيه نص ثانيه ..
يبقى مات !!
برضه ح تكمل يا بارد .. وتلاعبنى ؟!
إنت يا حقة بتاع !!
ياللا سلم ..
واعتبر الدور دا ضاع
ياللا يا ابنى ..

عندى لعب فى حته تانيه

ليه تلاعبنى وانت خايف

هيه كشه ..

وانت عارف ..

آدى ااهه ..

مش وعدتك ؟

كش .. مات !!

قوم خلاص الدور (فنش)

اللى بعده !!

مين يا عالم يملا عينى

مين ؟ ..

مافيش ؟ ..

الدماغ دى كمبيوتر

والتخين ما يهمنيش ..

حد له نفس يلاعبنى ؟

إنت ؟ ..

قوم !!

ياللا سلم !!

إوعى تغلط ..

إوعى .. حاسب

دورنا منقول ع الهوا ..

ياللا سلم !!

إنت مش شفت الدمار

همه يا ابنى نقلتين

والملك .. مش محمى خالص !!

ح اغلبك ويد (نابليون)

خطه مكشوفه وقديمه

بس برضه ح اغلبك

إنت باصص فین یا اخینا

بص – کلتک وزیرک – !!

یا لالا سلم

فین عساکرک ..

فین حصانک

وادی طابییه کلتهاک ..

کش ملک ..

یا لالا سلم ..

وادی فیل .. وعسکرین

کش تانی ..

بص .. اهه .. مات الملك !!

قوم خلاص .. ح تموت وراه ؟

إنتباه ..

تانی دور برضک (فنش) !!

مين عليه الدور يا عالم

مين يا عالم يملا عيني؟

مين .. ؟

يا عالم

نقلتين والدورح يخلص

ياالله سلم ..

ياالله سلم ..

ياالله سلم ..